



32. ՔԻՐԻՋ ԹԱՔԱՎՈՐԻ ԽԵՉՆԹԸ

Ժուկով-ժամանակով մե քաղաքում թաքավորում էր Քիրիջ անունով թաքավորը: Քիրիջ թաքավորը հինքը ծեր էր, հըմա մե չատ խորոտ, հուրի-փերի ջմհեկ կնիկ ուներ: Օրերից մե օր էս թաքավորի պալատին մոտցավ մե օտարական ձիավոր, կայնավ պալատի հանեչը ու ջուր ուզեց: Թաքավորի նաժիշտները ջուր բերին, չըվերցրեց:

Իշխանները բերին, էլի չըվերցրեց: Մեծ վագիրը բերեց, էլի չըվերցրեց:

Թաքավորն ասավ.—Ա՛յ օտարական, թե ծարավ ես, ջուրը խմա՛, թե ծարավ չես, հընչե՞ս էսքան մառթի չառչրում: Մեծ վագրի բերած ջո՞ւրն էլ չես խմում, ասա՛, տենամ՝ ի՞նչ մարթ ես: Էլ ջուր բերող չունենեք, մնում ենք ես ու թաքուհին:

Օտարականն ասավ.—Թաքավո՛րն ապրած կենա, ես մե հասարակ մարթ եմ, հըմա մինակ թաքուհու ձեռի ջուրը կրխմեմ:

Թաքավորը թաքուհուն ասավ.—Թաքուհի՛, օտարական մարթ ա, բան չըկա, տար մե թիս ջո՛ւր տու, թո խմա:

Թաքուհին ջուրը լցեց, հիչավ ցածր, ջուրը տարավ տվեց օտարական ձիավորին: Օտարականը ջուրը առավ, խմավ, «օխան՛յ» ասավ, թասը ետ տալու ժամանակ թասը քցեց, թաքուհու թեկից բռնեց, դրեց դուջաղն ու ձինը քչեց:

Ղայմաղալն հընգավ պալատը:

—Տարա՛վ, թաքուհուն տարա՛վ:

Մե քանի ձիավոր պաղրաստվան, որ հետեկից էթան, թաքավորը նոր հիմացավ, որ էտի Սիրտանկ դեն էր, զինվորներին ասավ.—Մի՛ գացեք, դուք Սիրտանկ դեկ ձեռից կնիկ բերող չեք:

Թաքավորն էնքան գլոխը տփեց, որ ըչկերը քոռցան, հընգավ պալատն ու մնաց:

Քիրիջ թաքավորը իրեք տղա ուներ: Տղերքը գնացեր են որսի: Հիրկուն որսից էկան, խորը տեսան, հիրանք էլ գլխները տփին, լացան: Սուս կացան:

Միյուս օրը ջոջ տղեն էկավ խոր մոտը, ասավ. — Ա՛յ խեր, էլ ի՞նչ տղա ենք, որ մեր մերը մնա ջերության մեջ, մենք ըստե նստենք: Իրավո՛ւնք տու, էթանք մեր մօրը ման գանք: Ախպերներս Համաձայն են:

Խերն ասավ. — Գնա ախպերներիտ կանչա՛:

Կանչեց:

— Տղե՛րք ջան, — ասավ խերը, — դուք ուզում եք էթաք ձեր մօրը քթնե՞ք:

Իրեքով էլ ասին՝ խա՛, ուզում ենք:

Թաքավորն ասավ. — Տղե՛րք ջան, էտ տարողը Սիրտակ դէն ա, դէի խետ գլոխ դնել չի հըլնի, կէթաք, իզուր տեղը կըկորչեք, տունս կըքանդվի:

Տղերքը, թե՛ չէ՛, որ չէ՛, բդի էթանք:

էն ժամանակ թաքավորը ջոջ տղին իրավունք տվեց, որ էթա, մե տարի ման գա, մե տարի ետո կըզա, նոր մեկէլ տղերքը կէթան: Ջոջ տղեն գնաց մե տարի ման էկավ, դանդը-դառտակ ետ էկավ:

էս տղեն մնաց տունը, միչնեկ տղեն գնաց: էս էլ դառտակ ետ էկավ:

էն վախտը պստի տղեն ասավ. — Հայրի՛կ, հիմի ես կէթամ, չանքի չըքթենեմ, չեմ գա:

Խերն ասավ. — Տղա՛ ջան, ես Հավատացած եմ, որ դու կըբերես: Գնա մեթարի մոտ, ասա՛, թո իմ ձինը դուս բերա: էս քսան տարի ա չեմ խեձե, չամիչ եմ տվե, պախեր եմ, հիմի լավ քոքցեր ա:

Իմ թուրը կախուկ ա պատից, գնա թուրս էլ վերցո՛ւ:

Կէթաս արեւելք, էնքան կէթաս, չընքի խասնես մե բիձա մարթի: Բիձին հըմմեն բանը դուզը կասես, կասես, որ Քիրիջ թաքավորի տղեն ես, մորտ տարեր ա Սիրտակ դէր, էթում ես բերելու: Բիձեն ինչ կասա, էնենց կանես:

Տղեն, ստանալով խոր օխնանքը, ճամբա յա հընգնում:

Գնաց, գնաց, խասավ Բափելին, ուզեց պատմա հիրա գալու նպատակը, բիձեն ասավ. — Գիտեմ, Մինա՛ս, գիտեմ, գնում ես մորտ փնտրելու:

Մինասը մնաց զարմացած:

— Դու ո՞րտեղից հիմացար իմ գալու նպատակը, իմ անունը, — խառցրեց Մինասը:

— Ես 365 տարեկան եմ, — ասավ Բափելը, — աշխարհը չիչ մարթ ա մնացե, որ իմ մոտը չի էկե: Սիրտակ դէր քո մորն էլ էս յանով տարավ:

— Բափե՛կ, — ասավ Մինասը, — ճամբեն նչա՛նց տու, էթամ:

Բափեյն ասավ.— Գնա՛, որդի՛ս: Օխնում եմ քո ճամբեն: Կէթաս օխտ օր, ճամբի վրեն պարկած ա մե աղվես: Աղվեսը քնուկ ա: Քառասուն օր ա քնում: Աղվեսի պոչից կրբոնես, կրվերցնես օխտ անքամ կրտփես ջետինը: Թե աղվեսը զարթնավ, Հանեչ չես էթա, չըզարթնավ՝ կէթաս: Կէթաս կըխասնես մե քաղաք: Էտ քաղաքում մարթիք էլ քառասուն օր քնում են: Հիմի ընդոնց քնելու ժամանակն ա: Բոլորը քնուկ են, մինակ մե արար ա զարթուն: Էս արարը պահակ ա: Գլխի վիրեր մե զանգ ա կախե: Որ քունը տանում ա, դանթում ա, գլխը կպնում ա զանգին, զարթնում ա: Էտ մարթի մոտով զգուշ կըհընցնես: Որ չեզի արարը տեսավ, էլ սաղ ետ չես գա, էս արարը սաղ քաղաքը ոտի կըխանա: Արարից էն յանը կայնուկ են մե ջել, մե դոչ: Էտ ջելն ու դոչը պալատն են պախում: Ղոչի Հանեչը դրուկ ա մե ջանդակ, ջելի Հանեչը դրուկ ա մե խուրց խոտ: Խոտը, որ դնես դոչի Հանեչը, ջանդակը՝ ջելի Հանեչը, ըտոնք չեզի ճամբա կըտան, կէթաս կըմտնես պալատը: Որ մտնես պալատը, քառասուն օթաղ ա, դռներն հիրար մեչ են բացվում: Քառասուն դռներով էլ ներս կըմտնես: Բացած դռները կըծասկես, ծասկած դռները կըբացես: Վեռչի օթաղի մեչ պարկած ա մե շատ սիրուն ախճիկ: Էտ ախճիկը քնուկ ա: Ախճկա գլխի տակը մե գիրք կա դրուկ, ստողի վրեն էլ մե սիրտակ կտոր: Գիրքն էլ կրվերցնես, կտորն էլ, կրգաս: Կտորն իմ պատանքն ա, գրքի մեչ էլ գրուկ ա, թե իմալ քո մորը բղի ազատես: Գիրքը կըկարթամ, էն վախտը կասեմ, էլ հիմի չեմ կանա բան ասի:

Տղեն Բափեյին «մնաս բարով» ասավ ու գնաց:

Գնաց խասավ աղվեսին, պոչից բռնեց, օխտ անքամ էնենց տվեց ջետին, որ չիչ մներ, աղվեսի սիրտն ու թոքը բերնից դուս գեր: Աղվեսը չըզարթնավ:

Մինասը գնաց հառաչ, խասավ արարին, տեսավ արարը դանթում ա, մոտով հընցավ, գնաց խասավ ջելին ու դոչին: Բարե տվեց, ըտոնք բարեններն առան, խոտը տվեց դոչին, միսը՝ ջելին:

Խառցուց.— Հընչի՞ եմ ձեզի անոթի պախում, հընչի՞ խոտը դրեր են, ջել՛, քո Հանեչը, դոչ միսն էլ դրեր են քո Հանեչը:

Ջելն ասավ.— Մեզի անոթի են պախում, որ չըքնենք: Քառասուն օրից ետո կըզարթնեն, մեզի ուտելիք կըտան: Շնորհակալ ենք, Մինա՛ս, գնա՛, չեզի չենք խանգարի:

Մինասը մտավ պալատը, բաց դռները ծասկեց, ծասկուկ դռները բացեց, խասավ ախճկա օթաղը: Գիրքը գլխի տակից վերցուց, կտորը ստողի վրայից վերցուց, դրեց թևի տակը, ուզեց էթա, մեկ էլ մտածեց. «Ես ջահել տղա եմ, էսի ջահել ախճիկ, գամ գողութուն անեմ, էթամ ախճկա հերեսն է՞լ չըպաչեմ, էլ ի՞նչ ջահել եմ:

Ախճկա հերեսը կրպաչեմ, կրբոնեն, ջնյնամ կրբոնեն, թո սպանեն», մթկի մեջն ասավ ու կզվավ ախճկան պաչեց:

Որ ախճկան պաչեց, ախճիկը զարթնավ, ալալորումը քցեց.—Դոնե՛ր, գողին բռնե՛ք:

Բաց դոներն ասին.—Էսքան վախտը բաց ինք, ճխանի վրա կայնելով մեռանք, չենք բռնի, էս տղեն մեզի ծասկեց:

Ծասկուկ դոներն ասին.—Էսքան վախտ ծասկուկ մեռանք, չենք բռնի, էս տղեն մեզ բացեց:

—Ղո՛չ, բռնա՛:

Ղոչն ասավ.—Էս քառասուն օր ա՛նոթի մեռնում ի, էս տղեն խոտ տվեց, չեմ բռնի:

—Ջե՛լ, բռնա՛:

Ջեն ասավ.—Էս քառասուն օր ա անոթի խատնում ի, էս տղեն միս տվեց, կուշտ ճերա, չեմ բռնի:

Տղեն ձինը քչեց փախավ, էկավ Բափեյի մոտ:

Բափեյը շատ ուրխցավ:

Վերցուց գիրքը կարթաց, տղին ասավ.—Էս ճամբով կեթաս, կըխասնես մե սիրտնակ ամարաթի: Էտ ամարաթը Սիրտնակ դեփ ամարաթն ա: Դեք հիմի քնուկ ա: Կէթաս մորտ մոտը: Մերտ ոնց կասա, էնենց կանես:

Մինասը ձինը քչեց, օխտ օրվա ճամբեն մե օր գնաց, խասավ Սիրտնակ դեփ ամարաթին:

Մերն ակուշկից տեսավ, էկավ փաթթվավ տղի վիզը, ասավ.—Մինա՛ս, ջան, փախի՛, գլո՛խտ ազատա, դեք, որ զարթննվ, ջոչ կտորտ անգաճտ կըթողա:

Մինասն ասավ.—Ա՛յ մեր, էկեր եմ չեզի տանելու, որ մեռնեմ էլ, չեմ էթա: Իմալ անենք դեփն սպանենք, որ էթանք, խերս էնքան ա գլոխը տփե, անկերը քոռցեր ա, ես դառտակ իմա՞լ էթամ իմ խոր հանգչը կայնեմ:

Մերն ասավ.—Մինա՛ս ջան, որ էտենց ա, արի էթանք դեփ օթաղը: Օթաղի մեչ կա մե կրբե կարաս: Թուրը զաններ ա կրբե կարասի մեչը, թե կանաս թուրը խանես, էտ թրով կըսպանես դեփն: Դեփն հուրիչ թուր չի սպանա:

Տղեն գնաց, թուրը կրբե կարասից քաչեց, ճխտեց դեփ սիրտը, սիրտն ու թոքը հիրար խառնեց, թուրը խանեց:

Դեմ ասավ.—Մինա՛ս, մե՛կ էլ զմրկ:

Մինասն ասավ.—Ես իմ թեփ հունարը ջիղում եմ, էտ էլ բոլ ա:

Դեք սատկավ: Մինասը վերցուց մորը, էկավ Բափեյի մոտ, որ չնորակալութուն ասա:

Մինասը, որ էկավ, Բափելը շատ նեղացավ, ասավ.—Ես չեզի չասեցի, որ գիրքն ու կտորը կըբերես, դու ի՞նչ իրավունքով ես փսճկա հերեսը պաչե:

Մինասն ամոթու կարմրավ:

Բափելը շարունակեց.—էտ փսճիկն էկավ մոտս: Քո հանգը էրկու պայման ա դնում: Յա բղի դու էն փսճկան ատնես, յա թե չէ, խետը կովես: Թողում ա քո կամքին: Ախճկա էն հերեսը, որ պաչեր ես, սեացեր ա, շատ ջղայնացեր ա:

Տղեն ասավ.—Բափե՛լ, եթե էն փսճիկն ընձի ուզում ա, ես ընդ-րա ջերին կըդառնամ, ընդրա վրեն ձեռ չեմ բանցրցու:

Տղեն, որ էսենց ասավ, փսճիկը էրեաց տղի անկին: Տղի մերը շատ ուրխցավ, որ էտ տեսակ խառս հռաստ էկավ: Էփսճկա հերեսի սեուլթունն էլ հընցավ, քանի որ հիրա մարթի պաչուկն էր, հո հու-րիչի պաչուկ չէր, որ մներ սե:

Բափելը չնախավորեց տղին, մորը անկի լուս տվեց, ու հինքը մեռավ: Մինասը Բափելին թաղեց, բերած կտորը արավ պատանք, վրեն մե ջոչ քար գլորեց դրեց, մորն ու կնգան վերցուց հընգավ ճամբա:

Բափելի մոտից գիրքը բերեր էր: էկավ տուն: Խերն ու փսպեր-ները շատ ուրխցան: Խառսը տեսավ, որ կեսրարը համ ծեր ա, համ քոռ ա, կիսուրը ջահել ա, հիրար հարմար չեն:

Ասավ.—Մինա՛ս, հո՞ւր ա իմ գիրքը:

Մինասն ասավ.—Գիրքը հըլա իմ խուրջինի մեջն ա:

Ախճիկն ասավ.—Գնա գիրքը բե՛ր:

Մինասը գիրքը բերեց, փսճիկը բացեց, կարթաց: Էս գրքի 359 հերեսի վրա գրուկ էր քոռը սաղացնելու դեղը: Բերին դեղը սար-քին, քսին թաքավորի ըչկերին: Թաքավորի ըչկերը բացվան:

Կարթացին 360 հերեսը: Գրուկ էր ջահելանալու դեղը: Էտ դեղն էլ պաղրաստին, տվին թաքավորին, թաքավորը ճերավ, ութանա-սուն տարեկան էր, դառցավ քառասուն տարեկան:

Բերին օխտ օր քեֆ արին թաքավորի խըմար, օխտ օր էլ տղին խառնիս արավ: Ճերան, խման, ձեր բարին հիշացին: Ընդոնք խա-սան հիրանց մուրազին, դուք էլ խասանեք ձեր մուրազին: